

AKASHVANI AIZAWL
REGIONAL NEWS BULLETIN

HEADLINES (EVENING)

- 1. Chief Minister Pu Lalduhoman vawiin khan Tualte khuaah buh chhun fin leh buh thar lawmna a hmanpui.
- 2. Tribal Pasaltha te chawimawina ni 'Janjatiya Gaurav Varsh -Tribal Pride Day' chu Raj Bhavan tualzawlah vawiin a ni 2-na ah hman chhunzawm a ni.
- 3. Prime minister Narendra Modia chuan vawiin khan Gujarat-a Dediapada atangin hmasawmna hna cheng vaibelchhe 9700 hu a hawng.
- 4. President Droupadi Murmu, Vice President C P Radhakrishnan leh Lok Sabha Speaker Om Birla te chuan vawiin khan New Delhi-a Parliament Complex-ah Dharti Aba Bhagwan Birsa Munda hriatrenga pangpar an dah.

<><><>

CM

Chief Minister Pu Lalduhoman vawiin khan Tualte khuaa Pu JH Lalnunmawia buh chhun fin leh buh thar lawmna a hmanpui a. Agriculture Minister Pu PC Vanlalruata leh Deputy Speaker Pu Lalfamkima ten an tawiawm.

Pu JH Lalnunmawia hian Tualte khuaa Artlang ramah Tin sawm leh pasarih hmuna zauvah buh a ching a. Tin sangthum leh zaruk a thar chhuak a, phur sangkhat leh zahnih a ni. Mizo buh tehkhawng anga sawiin Mau tlawn zawn hnih leh Silai zawn chhun fin anga tam nia sawi a ni.

Chief Minister chuan, hetiang hun hi vawiina kal khawmte hian an la hmuh a ring lova, an hmu leh pawhin a ring chiah tawh lo a ti a. A tam em avangin Mizo buh tam lam chhiar danah pawh hming a nei tawh lo a. Chuvang chuan he ni hi a hlu a ni, a ti. A tharchhuaktu Pu JH Lalnunmawiate chhungkua lawmpuiin, midangte tana malsawmna thlen thintu an nihna Pathianin mal a sawm a ni a ti.

Pu Lalduhoma chuan Sorkarin kuthnathawktute a ngaipawimawh tih sawiin sawhthing thartute iptea support price lut ringawt pawh hi a tam tham hle a. Hnathawktu, mi taimate tan kawh a eng mek a ni, a ti.

Tualte hian kuminah sawhthing atangin cheng nuai 163 vel an lalut a, Tomato atangin cheng nuai 175 vel an lalut tawh bawh a ni.



TRIBAL PRIDE DAY

Tribal Pasaltha te chawimawina ni 'Janjatiya Gaurav Varsh -Tribal Pride Day' chu Raj Bhavan tualzawlah vawiin a ni 2-na ah hman chhunzawm a ni a,

Tribal Pasaltha te chawimawina ni kharna inkhawmah hian Planning & Programme Implementation Department Secretary Pu Lalmalsawma Pachuau chuan thusawiin, Tribal Pride day an hman chu Tribal nihna leh Mizo nihna miin a chhuan tharna hun a ni chho zel tih sawiin, mahni nihna chu ngaihhlut zel a pawimawh tih a sawi a ni. Pu Lalmalsawma chuan Tribal Day puala Mizo kutchhuak hrang hrang phochhuah te chuan Mizote themthiam zia leh thil ngaihtuah chhuah thiam zia te a lantir tih sawiin, Mizo hnam hla leh lam an entir te pawhin Mizo khawtlang nunho dan te, nula leh tlangval hlim taka inkawm dan nuam tak te a entir tih sawiin, Mizo taka khawsak chu chapopuia ngaihhlut tham a nih thu sawiin, hnamdangte pawhin hetiang khawtlang nun hi an awt hle tih sawiin, thangthar te pawhin mahni hnam nunphung hrechiana an chhawmnun zel a pawimawh tih a sawi a ni.

Byte: Pu lalmalsawma Pachuau

Planning & Programme Implementation Department-a Project Assistant H.Lalhruaitluanga chuan India ramn zalenna a hmuh theih nana tribal hruiatu thawh hlawk tak, Bhagwan Birsa Munda pianchamphaphak vawi 150-na pualin November ni 1 atanga vawiin ni 15 thlengin ram puma British awpna lo sualtu, tribal pasaltha te chawimawina hun 'Janjatiya Gaurav Varsh' hi hman a ni tih a sawi a, Mizoramah chuan ni 2 chhung nimin leh vawiin-ah te hman a ni a, kumin hi a vawikhatna a ni a ti.

Mizorama Tribal pasaltha te chawimawina hmun Raj Bhavan tualzawlah hian Pasaltha Khuangchera, Nikuala, Lianphunga, Lalnu Ropuiliani leh Zakapa te chanchin leh an lem te phochhuah a ni a, Mizote kutchhuak hrang hrang stall 14-ah ei leh in tur, puan leh thiamhnang hmanga thil siam chhuah hrang hrangte chu mipui lei theiha phochhuah a ni tih a sawi bawk a ni.

Byte: H.Lalhruaitluanga

Kolasib District Bawrhsap Pisa kawtzawlah Janjatiya Gaurav Diwas kharna pualin hun hman a ni a, DC Pu Robert C. Lalhmangaiha chuan he hunah hian Mizoram pawhin zalenna sualtu huaissen Lalnu Ropuiliani leh mi ropui tak tak te an nei ve a ni tih hre reng turin kalkhawmte chu a chah a. British hunlaia Mizo lalte, a bikin Pu Lalgura Sailo (Sentlang Lal), Pu Liankunga Sailo (Mualvum Lal) leh Pu Thanghulha Sailo te'n huaissen taka British sorkar an dodal dante a sawi.

Kolasibah hian a kharna neih hma hian School of Nursing Thingdawl te leh DIET Kolasibah te hun hman a ni a. Hmun hrang hrangah Tribal themthiamna leh an kutchhuakte pholan a ni bawk.

Serchhip ah chuan DC Pu Paul L Khuma hovin Serchhip Pisapui Hall-ah tribal te chawisanna ni Janjatiya Gaurav Diwas lawm a ni a. Government Serchhip College zirtirtu pahnih Pu K Lalrinchhana leh Dr Zarzosanga ten Mizo pasaltha te leh zalenna sualtute, literature hmanga sulhnu pawimawh tam tak hnutchhiah tute

atanga zirtur te lakhawmin, zirlai leh Birsa Munda piancham puala Janjatiya Gaurav Diwas hmangtute an zirtir bawk a ni.

Janjatiya Gaurav Diwas hi kartluana neih a ni a. District Education Officer hmalaknain zirlaiten Mizo infiamna chi hrang hrang te an sikulah an entir a ni.

Saitualah chuan District Bawrhsap Dr. Lalingura Tlau hovin tribal te hotu Bhagwan Birsa Munda piancham kum 150-na, Janjatiya Gaurav Diwas lawmna hun hman a ni a, he hun chhung hian tribal te tana hmalakna kalpui niin, Saitual District khaw pathum , Tawizo, Sihfa, Lenchim khuaah te "Certificate & Aadhar free Camp" neih a ni a, mipuite chu a thlawn vekin certificate leh aadhaar te siam sak an ni.

<><><>

GASTROENTERITIS

Kawtha-lo hri inkaidarh awlsam tak a len avangin Siaha leh Lawngtlai a he hri lenna hnaih Myanmar ramri khar a ni a, mi 9-in an thihpui tawh.

Lawngtlai leh Siaha bawrhsapte chuan hri leng darh zel tur venna atan ramri a inkalpawh khapna thupek an chhuah a. 'Tuihri' ti a sawi, hriselna lam mithiamte'n 'gastroenteritis' an tih hri leng avang hian Lawngtlai district-a Kakichhuahah hian nizanah mi pakhat a thih belh leh avangin he khua a kawthalo/tuihri natna ni a rinhlelh vanga thi chu 6 an tling tawh a. Siaha district-ah 3 thi tawhin an vaiin mi 9 an thi tawh a ni.

Lawngtlai district-ah hian Kakichhuah khua-ah November ni 4 atang khan mi 5 an thi tawh a, thite hi Khumi hnam vek an ni a hriat a ni. Lawngtlai district-a Hruitezawl khua-ah pawh tuihri hi a leng mek ni a hriat a ni a, thuchiang nghah mek a ni.

Siaha district-ah chuan Lomasu leh Lodaw khua-ah he hri hi a leng mek a. Lodaw khua-ah mi 3 an thi tawh a. Lomasu khuaah hian November ni 5-ah damlo an awm tan a, Lodaw khuaah November ni 11-ah he hri leng kai hi hmuhchhuah a ni bawk a. Lomasu khuaah he hri kai hi 14 awmin, Lodaw khuaah mi 4-in an kai bawk a ni.

He tih lai hian Siaha leh Lawngtlai district ramri Chin state chhim lama Paletwa bial chhunga Sinletwa khua-ah khawthalo natna vei hi mi 300 chuang an awm tih report a awm a. Arakan hel pawl, helai bial awptu United League of Arakan (ULA) leh an ralthuam keng pawl Arakan Army te chuan damlo na zualte an enkawl mek niin an sawi a. Siaha leh Lawngtlai district a tuihri kaite pawh hi Myanmar lam atanga lo lutte kaichhawn ni a hriat a ni.

Lawngtlai bawrhsap Pu Donny Lalruatsanga chuan vawiin khan chanchinbumite kawmin hrileng vangin Sorkar chuan theihtawp a chhuah tih a sawi a, Hri chu Myanmar ram chhung, Salachhuah atanga rawn lut ni a an hriat thute, tun dinhmun ah Kakichhuah leh Hruitezawl chu 'Containment area' a puan a nih tawh thu a sawi a, Sr. CMO kaihruaina hnuaiah Medical Team- ten an vil reng bakah, World Health Organisation (WHO) Medical Team leh Doctor without Borders- te pawh Hri lenna hmunah hian lutin an thutchilh tawh a ti a, state sorkar a hotu lian zawkah pawh an dinhmun a thlen tawh thu Bawrhsap chuan a sawilang tel bawk.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

PM

Prime minister Narendra Modia chuan vawiin khan Gujarat-a Narmada district chhung tribal tamna khua Dediapada atangin hmasawnna hna cheng vaibelchhe 9700 hu a hawng. Heng project te hi hmasawnna ruhrelte, hriselna lamte, zirna leh ram rohlu vawnhimna turte a ni a. Tribalte dinhmun chawikanna tura duan bik an ni a. Vawiina Janjatiya Gaurav Divas,National Tribal Day puala hun hmannaah heng project te hi a hawng a ni.

Thusawiin Prime Minister Modia chuan tribal te propuina chu kum sang chuang ramchhung mite thinlungah a awm reng a ti a. Ram zahawmnate, ram ropuina leh thuneihnate sawi a nih apiangin tribalte chanchin chu sawi hmasak a ni zel a ti a. Ram zalenna tura tribal te thawhhlawk zia chu theihnghilh theih a ni tawh lo ang a ti bawk. Janjatiya Gaurav Divas National Tribal Day hi ram zalenna sual tu ropui leh tribal leader Bhagwan Birsa Munda piancham ah lawm thin a ni a. Kumin hi vawi 150 na tur a ni.

<><><>

PRESIDENT

President Droupadi Murmu, Vice President C P Radhakrishnan leh Lok Sabha Speaker Om Birla te chuan vawiin khan New Delhi-a Parliament Complex-ah Dharti Aba Bhagwan Birsa Munda hriatrenga pangpar an dah. President Murmu chuan vawiina Bhagwan Birsa Munda piancham pualin kum 2021 atangin rampumah lawm thin a ni a ti a. Vice President pawhin Bhagwan Birsa Munda chuan ram chhunga thalaite thinlungah hman atanga vawiin thlengin ram hmangaihna a tuh tih sawiin ram zalenna sualtu dangte nen mipui thinlungah an nung reng tawh ang a ti bawk. Lok Sabha Speaker Om Birla pawhin Birsa Munda chu ram zalenna tura a theihtawp a chhuahnate, tribal te dinhmun chawikanna tur leh an zahawmna humhim tura a beihna chu mitin thinlungah a cham reng ang a ti bawk.

<><><>